

摘藻堂四庫全書薈要

集部

欽定四庫全書薈要卷一萬五千九百七十六

集部

陵陽集卷九

元年嶽撰

記

范文正公忠烈廟記

文正范公忠烈廟今在姑蘇三讓里天平山公自睦移  
守鄉郡再省三世松楸不但漢人過家上冢之榮而已  
嘗建白雲菴奉香火洎登政府得追奉三世置墳寺始  
奏改菴為白雲寺祀徐國公唐國公周國公蓋慶歷時

也猶未有忠烈廟之名先是元昊據靈武納旌節僭位號威脅諸羗肆為邊患朝議舉兵攻討遂以邊事付公首用种世衡築青澗城扼衝要大營屯田聽民互市廊延乃異時西夏貢路但嚴備不出以示招納又築大順城以捍環慶築細腰胡蘆十二寨以制明珠城二族元昊勢漸析乃命公及諸號知兵者分領要害為持久計以待其敝已而昊卒內疑如公言而公在廟堂以議論不同均佚南陽繼遂謝事矣公內剛外和恩威迭用

當時邊人相語此小范老子胃中有數萬甲兵不比大范指雍也或又以龍圖老子大范老子稱之其為人所畏愛如此邠慶諸郡與屬羗皆立生祠繪像以事其終也屬羗酋數百舉哀僧舍哭之如此三日乃去宣和間慶帥宇文虛中以郡人思公不忘祠祀甚謹奏賜額忠烈廟它有舊額皆易新榜紹興失秦隴慶陽廟貌邈在它方始改奉于天平山每歲上巳三司率僚屬郡博士率前序偕來致祭廟久頽毀至元乙酉主祭邦瑞提管

士貴共議重建取義學餘米歸之義莊為土木費司計  
邦翰宗遜等佐之其年四月既望新廟城丙戌二月既  
望率族奉安前設文正公神像內設三國公神儀廟凡  
十楹黜堊丹漆備極壯麗供具皆完好大德甲辰行省  
聞於朝禁治煩擾崇奉尤嚴於是士貴以書抵某碑記  
厥成謏焉末學固辭弗獲惟昔文正公在朝間延州危  
急自請代張存正欲委身不測之地人以為難某竊謂  
未若公上百官圖詆宰相為張禹雖觸盛怒坐以越職

曾不少沮為尤難蓋不顧其一身之利害禍福故能  
內肅朝綱外抗方面謚曰文正廟號忠烈如是之偉  
也夫士大夫則知尊祖矣尊之者何銘其德善也是  
宜作為銘詩刻石列廡下其辭曰

南陽諸葛蜀漢再造志決身殲民哭陌道乃廟沔陽  
成都夔子號曰忠武西人悲喜相傳尚記馘雙誅卻  
於惟文正異世同轍雖老益壯雖死不亡精忠盛烈  
夏日秋霜昔討靈武皇威遠加聲勢震燁摧其角牙

忠宣有廟叅錯西土公像在堂莫予敢侮天平之山  
白雲之泉公歸自西廟貌宛然誰實新之偉矣柱石  
上公之服揚休山立內祀先公爰備廟制維垣啟宇  
光榮三世式濟美忠宣弟之昆粦至斯今代有賢孫  
廼厚義廩廼廣義學同志合慮新廟攸作潔我牲牢  
率我宗黨竭虔妥靈默通盼蠻公在帝旁玉虬既駕  
神遊逶迤馭風來下佑我後人俾熾而昌廟祐是保  
千載奉嘗

蒼山小隱記

歙之婺源有佳士曰遯叟戴君宜自其先人以詩書遺  
後至君宜遂發聞而著能名負屈稱久泊然無當世意  
蓋嘗取邵子書四四而相因為十六者上下究極之嘆  
曰世逾邈歲逾老茲庸詎非吾自佚時乎別業在蒼山  
距其居二里許饒信諸峯環左右皆歷歷可名物指數  
一方勝處也築樓藏書隱事已畧具復營小隱於山之  
旁且疏泉自山趾以為九曲池游者必道池中曰橫舟



者以入稍進則名花異卉駢羅雜襲於四時佳致窈而  
洞崇而壇位置畧如京洛好事家又進則羅分二圃蒔  
佳鞠而挹晚香若松梅類也參合四并與主人而五其  
堂曰五隱蕭然幽人靜士之廬也又益進則島汴紫環  
有船出菰蒲中桃花流水試尋源而問三山對峙藏春  
中敞霞蒸繡錯亭觀相望便疑神仙去人不遠遯叟杖  
履日遊而樂之曰是足佚吾老矣馳書茗雪屬予記予  
每病世之隘小舉足輒值墻壁抵荆榛顧在隱約而平

寬若遯叟之於蒼山者其樂蓋無涯而君以為小隱何也東方生陽狂滑稽自謂陸沉於俗避世金馬門何必深山之中蒿蘆之下於是有大隱隱朝市小隱隱陵藪之論世之出入名利者此固其所藉口小隱豈果小哉吾嘗聞大隱於夫子曰賢者避世蓋已居避色避言之右而乾初九之文言遂發其義曰遯世無悶夫不見是而無悶非乾之大孰能之遯乾之變也故曰遯而亨而亦有大矣哉之辭未有大而不亨者也至於考槃在澗

碩人之寬乃詩人所以形容賢者退而窮處之德體氣象而夫子曰於考槃之詩見遯世之士者而無悶於世遽與乾並言之夫亦惟其大而已矣吾所謂大隱者蓋如此要非方朔輩所可與遯叟應虎學甚博氣甚靜不怵於物變者而遷方且依山林即閒曠窮理而參乎數以觀夫寒暑之代謝草木之零茂人事之儵來忽往而自樂其所樂以遂隱居求志之願於夫子所稱易詩之旨固已識其大者况生紫陽之里同遯翁之號而九曲

之池實為小隱稱首其仰高希賢尤切余恨未能一至  
其處竊惟九曲有大隱屏之名反招隱者也敢附斯義  
以復於遯叟其小也祇以為大歟彼潭之東池離而志  
不果者也余得以畧遯叟曰大矣哉子之大吾隱也乃  
歌曰雲山之蒼蒼兮言采其榮其下九曲兮彷彿乎大  
隱之屏吾端策而得遯兮又慕夫嘉名噫孰知吾之樂  
乎肆其外而中閤紛衆美此具備乎大莫大乎吾身吾  
將出王游衍兮曰旦而明藏之至密兮拓之無垠舉堪

與其猶小兮何況朝市之與山林

木齋記

東平李君公畧自號木齋間以諗予予曰古蓋有端木其氏干木其名子木其字木心人其號者抑是之取乎公畧曰濟也非敢自擬於是顧平生狷急徃徃以語言忤物欲為椎魯木強而不能早聞論語木訥近仁之義因竊取其警焉特未知蒙莊氏所稱形如槁木望之如木鷄者何如也試為我訂之夫仁道至大夫子何取於

形之不外飾歟故其言也詎木訥類也則亦許之以仁  
巧言令色反乎木訥也則直以鮮仁目之人患不木訥  
耳然嘗觀之木質樸堅韌之中蓋有閭動發生者在於  
其形不於其心非所以論仁亦非所以論木也人有心  
木亦有心仁人心也心之德也且孰為木之心春盛德  
在木是木之德具於心者也春也即仁也木神則仁是  
木之神妙於心者也仁也亦春也程子曰木仁之氣象  
惻隱之心春之氣象木也春也仁也蓋合三者而言此

木訥之所以為仁質樸堅韌之所以為閭動發生也公  
畧其以形求之乎以心求之乎天下固有形似而心非  
者彼南郭子綦以形之徒勞行若馳而莫之止也終身  
役役而無功也嗒然隱几使如槁木焉似矣然心可使  
如死灰乎紀消氏以鷄之欲鬪虛憍而恃氣也應響景  
而疾視也養之三月使如木鷄焉亦似矣然其德全者  
豈吾所謂心之德乎信斯言也是率天下而不仁也毫  
釐之差千里之謬蓋不可以不辨公畧有文墨議論嘗

為吳興糾曹又為臺省掾皆有聲質直而好義志仁而無惡不肯嬖阿容悅固已知木訥之義矣予猶疑於形似之間故以是語焉

以齋記

漢嘉以我眉重本名眉山郡後乃易今名不但山川奇絕聞天下昔康節翁前知靖康分裂此為善地可避兵故邵氏之孫皆來卜居七易之學遂盛行於蜀其地距我鄉百里鷄犬聲相聞也我先人嘗仕焉當寶慶丁亥



而予以生越十有二年侍親去蜀昔之善地芥為荊棘六十必復今已踰其數矣辛丑曹君克明舉茂異自燕來杭漢復有人在省需選聞之良喜張仲實為予言克明篤實有氣義異乎流俗閉門讀書一意於學謂易六十四卦卦下象皆有以字因以以名其齋且求予語夫易聖人有憂患之所作吾與克明俱流落萬里外憂患備嘗固當相與共講焉易之諸卦皆觀象取法乾居其首孔子於此不過曰天行健何哉伊川曰天道覆育之

象至大非聖人莫能體欲人皆可取法故取其健而已  
君子以自強不息法天行之健也大率人一呼吸為一  
息一息之間天行八十里一晝夜萬三千六百息故天  
行百萬餘里然則天之行健人之自強不息實相流通  
一息間斷人與天始不相似矣以齋之以要當法乾之  
自強不息而予讀文言則又知所以自強不息在於學  
以聚之問以辨之兩言者又學者喫緊用力處天之運  
行無已時則人之學問無止法孔子猶韋編三絕而况

他人學者誠能用其力者雖休勿休習中有全易而理無不明自一至六十四何莫非吾日用間事朱子曰以者聖人以易之書也克明尚勉之予耄悞不能進矣毋忘鄉里故其亦有以儆我哉

范文正公義學記

古者二十五家為閭閻左右各設塾鄉先生為之師裒衣博帶晨坐閭門教其民之出入田畝者有教有養誠為良法自井田廢閭塾廢古制盪除漢以來或為講堂

為精舍而養則未之聞也范文正公嘗建義宅置義田  
義莊以收其宗族又設以義學教養咸備意最近古夷  
攷厥初宋時天下有四書院應天府書院為首先是郡  
人戚同文聚徒講授士不遠千里而至文正公亦依之  
以學同文為人質直尚信義宗族貧乏則賙給之喪則  
賑卹之不積財不營居室或勉之輒曰人生以行義為  
貴安用是義之一字實與公意合暨公登第立朝為守  
為帥以至大用名位日盛祿賜日厚遂成義莊義學為

其宗族宅於斯學於斯所耕者義田所游者義路何適  
不宜嘉遺後人可謂篤至繼繼承承亦惟成規是守粵  
乙亥兵戈倣擾未遑茲事至元丁丑提管士貴主祭邦  
瑞共議興學卜地於吳縣三讓里距祖塋二里所涓日  
庀工為屋三十楹祀文正公於其中會講之堂扁曰清  
白東齋曰知本西齋曰敬身外闢室為教諭偃息之處  
庖湍廩廡蔬茹之圃咸在外為周垣扁其大門曰義學  
清溪松竹之間昉聞絃誦聲是役也義莊掌計之勞為

多提管又撙節助濟浮用增田山僅百畝備師資束脩  
之禮子弟筆札之費一有以勸大德戊戌朝旨以義莊  
義學有補世教申飭攸司禁治煩擾嘗加優恤無復干  
吾藩者可肆意於學矣至大戊申提管馳書來雪俾為  
之記昔錢公輔嘗記義田某也何敢與斯文竊聞文正  
公早歲就學應天時夜以繼旦冬月憊甚以水沃面食  
糜度日人不堪其憂其苦心勞形者如此博通六經尤  
長於易學者從之叩質樂為往復無微弗究其難疑答

問者又如此用力何啻十倍令人耶咨爾來學書爾佩  
衿盍亦追思先志俛焉孳孳毋以寒暑而為作輟庶幾  
他日業精行成式克有立得為名儒以應選用以副二  
范君惓惓興學之意其年七月旦日記

重修妙行院記

杭北關之外江漲橋至左家橋有喻彌陀淨公接待妙  
行院淨公早歲喜畫彌陀佛無為子楊次公呼之曰喻  
彌陀名遂大傳院距喻家橋甚邇蓋以其姓姓其橋也

予異時屢至焉比不至且久每記無垢張公所作宰堵  
銘具言方臘之亂淨公徑入賊壘願以一身代一城之  
命賊悚為少戢夫為善之心勇猛堅確而本於誠實是  
能感通神明彼盜賊之徒雖甚悍桀亦有人心寧不為  
之革面改圖惟善之歸乎况推之以造事立業將無不  
可為者淨公前後所為如欲飯百萬僧乃至三百餘萬  
鑿西湖多寶山為彌勒像又增廣其居為殿堂樓觀皆  
一念之誠實始而終之方其畫時坐一淨室禪觀寂然



見阿彌陀光明好像而後下筆故所畫如所見凡所建  
造如其所畫也事見於張忠獻趙忠簡張無盡之頌之  
贊皆世之鉅人元夫也園悟勤大慧杲真歇了皆敬重  
之如見在佛則佛法中之大知證也不亦偉歟院更多  
故久就摧圯幼山冲公提點早受業妙行往來諸山遍  
歷僧職各有勞能雅意第欲弘其祖師前規以酬夙願  
而已乃以華亭義興兩莊八百六十餘畝山一百五十  
餘畝歸之常住一新其院三門藏殿佛殿浴室無量壽

閣廊廡楣楹高下曲折奇花異卉芳菲掩映宛為勝處  
大開養魚池每歲臨池放生以申祝讚園圍洋洋不可  
勝紀又通船步拓蔬圃廣梅檀林以安挂錫至於建善  
提園修水陸堂由中徂外莫不完備祖師心傳所謂勇  
猛堅確而本之誠實者朝夕奉以從事冲公年已八十  
許健強如六七十其力足以達其所為用克底於成先  
是喻彌陀之寂也張循忠烈王以文祭之王五世孫模  
予婿也承其先志以來求記戊申十一月也予聞冲公

自稱方是閒觀其大作佛事無負祖師之付囑亦可以  
少閒矣而猶曰未是閒也自有此院未始有記真大欠  
闕事必得記方是閒也其果遂可閒歟予願冲公益加  
之意雖休勿休喻彌陀死而不亡歲時來歸顧瞻新宇  
亦當忻然為之一笑

松江普照寺記

一切世間佛法最盛盛矣而不能不變者數也變矣而  
不能不復者時也必理足以馭數而不盡諉乎數智足

以因時而不至違乎時而其能又足以立事式克底於  
成故垂名無窮焉普照本堂乾元元年大明寺也相傳  
為陸氏故居始孫吳時陸抗封華亭侯世居華谷三十  
五里谷水之陽崑山之陰時尚隸姑蘇天寶十年始為  
縣石晉天福五年始創秀州割華亭以隸至元丁丑陞  
為松江府史傳稱陸機自孫氏之亡退居舊里蓋自建  
業宅歸也普照豈非其別墅歟自夢形黑幘地化寶坊  
春鐘擊鼓而作佛事此其盛之始也會昌五年天下僧

寺皆廢普照亦其一也錢氏時鎮守司空張瑗於寺後鑿河通流寺故基去三之二矣此其變之始也大中十二年良惠元珂等再建寺宋祥符元年改為普照主僧必以學行者克寺僧凡二百餘房至無所容此其變而復盛者也建炎紹興至淳祐戊申屢經鬱攸此其屢變者也寶祐乙卯行金再造山門翬飛翼跂此其屢變而復盛者也役之大者釋迦殿千佛水陸院千僧海會堂予嘗為記以具載其事他如庫廳海月堂即高僧惠辨

號海月法師也梵修院嘗立觀堂即舊之五百羅漢殿也善住教院即舊之東塔院也至於圓通殿西方殿懺院藏殿之類靡不完具鐘樓鉦鐘聲聞五十里而寶塔崢嶸屹出雲表尤為奇觀每歲官僚於此建道場申祝讚益廣善緣為民祈福遇首春仲春仲夏四立日皆修期觀誦經典率以為常此皆前後諸人所共修營或捐已貲或轉化施或出主僧或出徒弟其智足因時而能足以立事不徒誇諸數也庶幾盛而不復變焉前主僧

佛智通悟大師子聞實相與規度叶贊其力居多大德  
丁未因來求記非徒侈土木之盛也以見諸人之勞使  
後者攷也况佛之智慧即吾之智慧不如待時也佛之  
能仁即吾之能用力於仁也豈流俗任智矜能者之比  
哉銘曰

大相國寺并包百數殊塗同歸不内外故人之觀物  
必於會通剖去藩籬是謂大同林林總總普照院室  
言栖爾單幾瓶幾錫有萬其法各開戶牖貫以一理

何殊已有而今而後闡爾宏規洞朗軒闢盡撤己私自  
然福德遍河沙界不可限量亦無障礙是為普照釋迦  
之殿高竦挿雲邦壤攸奠蒲牢霜吼扶桑日出紅光陸  
離幽霧辟易靡所不照斯之謂普普照之中物無患苦  
潮汐以時亦無風灾稻海日富布施日來稽首佛慈其  
何以報謹爾薰修是祈是禱悔過興善一念猛烈願爾  
衆生永離塵劫

君子軒



是氣流行陽一而陰二故為君子者常少不為君子者常多有所不及則有所勝焉惟立教之君子以降衷秉彛修道而制其數以默扶造化之所不及之為君子亦欲人之皆為君子君子多則為物之春否則草木當大夏而黃落分數多少之間教之淺深之驗也古者家塾而黨庠遂序小學而大學皆有教法當其時之可不過時而扞格也知類通達至於大成不小成而止也從容以盡其聲不徒記問也長善而救其失不徒私淑艾也

此即孟子所謂君子所以教者五雖各因其人品所施若殊要不過教人使為君子而已先儒以孔孟弟子言之時雨化之之顏曾成德之閔冉達財之由賜固君子也若乃樊遲之不終絕於君子陳亢之槩有聞於君子亦得與於答問私淑艾焉由是而推誠聖門教人之大法也後百餘載孔子所教之君子散在四方既已畧盡異端起而功利熾孟子不求勝之惟舉聖法以示學者聖法修則君子多君子多則邪說息孟子之所願也孟

子亞聖似顏子傳道似曾子時無孔子不當在弟子之列方且日與其徒難疑答問歛然自謂予未得為孔子徒也予私淑諸人也夫孟子曾不得為時雨之事淑艾自私獨為君子豈其所願哉天之生聖賢固不使其自有餘於已而獨為君子也張仲實居今而學古從之者衆乃拓學古齋之右創為使齋疏朗清曠體日以舒教日以專學者日以親予本孟子語榜之曰君子軒而戴君師初為之銘仲實復求予語予聞數歲來吾黨之私

淑父者不忍獨善頗出其緒餘以惠後進絃誦之聲相  
聞教之將盛歟况欲人之為君子而幸世之多君子仲  
實夙志也今將進而任君子之教與世道之責有大於  
是惟吾仲實勉焉若時雨之義則師初之銘美之矣

陵陽集卷九

欽定四庫全書薈要卷一萬五千九百七十七

集部

陵陽集卷十

元牟巖撰

記

周公謹復菴記

周公謹以復名其山中之菴間謂予曰歲丁丑吾廬破  
始去而寓杭燕雀過故墟猶有喁喁之意况先中丞迨  
先人三世之墓故在雪歲一至或再至焉輒徬徨不忍  
去年益老懼無以自還把恨沒齒近得吉土先人之塋

側倘異時營菟裘遂孤首下從九京志願畢矣幸為我  
記復菴新息後在泊浪鳶影站站中卧念從弟少游平  
生語欲守墳墓稱鄉里不可得今杭視雪為旁近郡公  
謹歲時展省沃醑不廢已得為馬少游尚何羨乎復雖  
然試為子言之天地之間一氣混淪而磅礴求之於黃  
鐘八十一分九寸之管牽牛一丈三尺一寸四分之晷  
陽九萬四千六百一十七歲出入之元求其復也豈不  
在吾方寸中剥爛復反窮而後有復失而後有復君家

無極翁曰復其不善之動而已復則無不善焉復之初  
九復之善者也不遠而復何悔之有故曰元吉大之也  
若乃六三頻復失之屢危矣而猶曰无咎六四獨復力  
之微難矣而猶曰以從道此其意開人以善自非終迷  
不復如上六未嘗不致其惓惓公謹僑寄他邦蓋不得  
尚若窮於性分未云失也顧戚然以遠家事為已缺者  
亟圖維厥終使治復菴而日從事於復不以獨復之難  
自阻必以不遠復之善自期一旦膏車秣馬問復菴之



里闖其藩而休於其居圖書無恙鷄犬相識忻然以笑  
曰吾今始真歸矣載瞻楸櫟根莖芽甲於霜露之既降  
而函活於春雨之既濡喜極而感則又以之怵惕以之  
焄蒿而悽愴此固吾方寸中之一大復卦也因思夫物  
潰反原以已屈之氣為方寸中之氣者則非吾所復而  
得吾之初焉善孰有加於此抑予聞復善道也亦長道  
也其未復也順而正以觀其長其既復也順而行以導  
其長順斯長而亨出入無疾則眉壽無害考終命之福

也朋來無咎則子孫逢吉必復其始之祥也予敢自附  
善頌以落復菴之成

俞好問交樂軒記

俞好問名其軒曰交樂以問於吾吾曰是何居好問曰  
吾得之蒙莊書吾曰豈非老子之語南榮趯所謂交食  
於地交樂於天者歟他日子綦以語九方歆則又曰邀  
食焉邀樂焉何也夫交者同也邀者求也試就其說而  
言之曰交是矣交食於地人樂也交樂於天天樂也人

樂與人為徒者也天樂與天為徒者也人游乎天地之內而未出乎天地之外是故人物同宇而物易汨乎人利害同域而害實生乎利四者蓋同行而異情天而不人則相安以恬樂也人而不天則相爭以奪不樂也嗚呼安得至人而與之論天樂好問胸襟灑落疎快無町畦無留藏居敢溪之上蕭爽數椽堂有老母以志為養菽水盡歡有如甘旨一可樂其性喜書畫抄夜誦有四猶子時來講說二可樂又喜為詩操筆立就有佳客至

相與噍哦三可樂隙地雜植有香之花四時皆春芳菲不斷四可樂好問每曰我交食於地不與地爭噍噉之利交樂於天不與天爭陰陽之和孰為人與物孰為利與害惟其無四者之累是以有四者之樂未嘗力邀而強取之如子之云者天耶人耶人耶天耶吾聞之嘆曰吾於好問托其交而不知其樂吾其至愚哉何足與論天樂雖然至愚同至人其亦可樂吾所樂乎哉

重刻晦菴景行堂記

古者建學釋奠必有合有國故則否而鄉先生亦得祭於社焉三衢郡故有尊賢祠如端明汪公太史范公猶合之他邦惟江山縣學祠是正介先生而次五賢於景行堂則國故也鄉先生之位也文公朱子記其氏名與其學行氣節備矣車牽之卒章曰高山仰止景行行止孔子亟稱之以為好賢如此此五賢之所立雖若不同然正介學於胡安定延平學於楊龜山所以求仁也諫議力攻蔡京童貫仁人之能惡人也叔績以一士曹掾

叱睦寇宅卿以一太學生責金人則又殺身成仁者也  
壹是皆人心天理之不可泯攷信史叅軼聞大書深刻  
以風勵當世而興起後人蓋詩之好仁朱子有焉夫無  
欲而好仁一人而已在孔子時已歎其少況後乎孔子  
後乎朱子乎淳熙以來僅百餘載碑已泯漫殘缺越在  
榛莽過者恬弗怪焉嗚呼可觀世變矣郡人柴君來領  
教事丞與周君謨召匠治石更為刻遺文重擔穹趺視  
舊加嚴於是五賢之遺風餘烈猶有足證暫晦益彰而

觀者亦改容更貌復知學行節氣之可貴可重可企慕  
有功斯文有補世教實大其庶幾能好朱子之所好者  
歟二君皆名家後柴君諫議四世外諸孫其先世潛心  
君兄弟嘗與延平共學龜山之門而周君則正介諸孫  
也至今猶藏其詩稿源流有自是尤可紀者既成屬某  
識顛末某父子嘗先後貳衢他日子將按部又至焉每  
以未得一拜祠下為恨焉今隲伏深潛旦暮且迫乃幸  
睹是刻之新獲附名於碑因竊自喜夫高山仰止者知

之事景行行止者行之事何莫非學亦何莫非仁俛焉  
孳孳惟尊聞行知是務此又朱子所為推本於學之意  
因併以諗觀者云

重修顏魯公祠堂記

吳興多賢守在唐顏魯公以名節著人皆曰吾邦魯公  
也余則曰天下魯公也蓋張巡許遠從父兄杲卿一輩  
人平原蔡州事具史冊無庸察察言惟是乾元己亥公  
嘗撰天下放生池碑銘進之而其再進大字本則上元



庚子帥百僚上表請問起居西宮遂貶蓬川則庚子八月越明年辛丑至大歷癸丑十有三年公由臨汝轉吳興始追刻而建之郡東放生之池上所謂一日三朝大明天子之孝問安視膳不改家人之禮示天下必有尊也蘇文公以為公實規諷肅宗非區區放生池者可謂知公之心惟公大忠大慮奮不顧身每為朝廷爭典禮為國家折奸邪而又一正其本為天下萬世明綱常使凡為人臣子無敢遺君後親雖觸忤隕越卒陷死地而

不悔夫感慨殺身易從容就義難平居能犯顏敢諫則  
臨難能仗節死誼茲其為天下魯公也歟當宋嘉祐辛  
丑之際始即池上荆魯公祠紹興初始賜額忠烈廟崇  
樹表章偉矣乃自近歲編戶雜居廟毀像壞過者太息  
東平李侯奇以令辛丑夏四月實來為守下車聞之矍  
然承按祀典考郡乘躬至其處叅訂申畫而謀諸長若  
貳佐作新廟民相其役始七月成十月中肖公像揭虔  
妥靈大其門廡敞其軒楹規制尤宏傑既用牲祠下郡

學教授周鮪以侯意屬記於陵陽牟某某氓也弗獲辭  
焉嗚呼輪奐雖新感懷猶昔嘗試憑楹而觀波光渺瀰  
鏡明黛蓄照徹上下而公忠義所在其精神之盛焄蒿  
悽愴千載如生安知不睠遺民懷遺刻乘風雲而來下  
余蓋不足以見之若夫勵荒而興懷聳善而扶正如李  
侯之為者則誠有補世教而卓然異於流俗可尚矣詩  
云高山仰止景行行止維侯有焉後之人尚毋忘斯語  
是為記

普照千僧海會堂記

三代盛時禮樂制度學校倫敦修設明備外物莫干其  
藩厥後寢衰以微東漢明帝時三法闡摩騰首負四十  
二章經至白馬寺符丈六金身之夢上所崇信趨者瀾  
倒諸人先生徒持空言以抗曾莫之止日蔓月滋唐會  
昌五年以前不啻二十七萬餘僧宋天禧以後不啻三  
十九萬何其盛也一盛一衰相與消長勢使之然昔伊  
川程子嘗遊覺海惠林精舍見衆衲方食忽嘆曰三代

威儀盡在是矣彼其拜則膝拜衣則條衣非可比而同之三代程子之言顧若是何歟禮失必求之野或者觀其會而得其意歟方其于于而來脫雙屨而升臨席而坐不語而食蔬食菜羹必祭如心齋如雍容可觀古意猶有存焉者故程子有慨於衷不覺喟然而嘆歟禮儀三百威儀三千其目繁多要不必盡同亦取其意之存乎古者而已它可類推特未知佛氏所謂三千威儀八百細行同乎否乎維松江普照寺有千僧堂自唐乾元

宋淳祐丙戌由回祿之厄無復舊觀宗教六師祖祥之所建潼川北澗之所建者又悉為瓦礫之場至元丙子萬戶沙侯來鎮是邑與慧悟興教大師某相為倡率首創鐘樓庫堂西廡而千僧堂未遑暇也又四年己卯里人趙架閣施所居堂為之因陋就簡意未稱臨化之際專以此事囑其後人於是徒弟通辨大師其銖積寸累且募檀施大德癸卯於舊址重建其堂完明周密風日不到設座備物使僧衆得以如法而住繙誦經帙下自

已功夫出則聽說法申祝讚功德無量因來求文以記  
逆施之人當去未去視彼臨化灑脫明了一辦大事者  
為何如且強立文字以傳久遠海會之叢林有具眼者  
不得獻笑乎重說偈言曰

盛哉海會千僧之堂是為普照選佛之場其有禪客  
白丹霞帔若去選官不如選佛霞問選佛當在何所  
選佛之堂江西馬祖萬中選千千中選百於百之中  
又選其一愈選愈少其義伊何人以為少我猶曰多

有如此堂願友所造窻几靜深床坐完好夏有疏簟  
冬有重席攝衣而起振履而出千僧齊唱一口百聲  
千口萬聲清徹朗朗有大導師默然晏坐忽獅子吼  
喚醒惛情聞者震越得大警悟須臾之頃萬善咸具  
凡諸佛子皆得度已稽首首照朝夕彈指

紹興嵯縣新建東嶽行祠記

古者諸侯祭境內山川以其能出雲氣為風雨祭之禮  
也春秋書魯猶三望公羊氏曰望者望祭泰山河海也



鄭司農以為魯境不及河魯得祭泰山曰河者非也三望淮海岱也公羊蓋失之然魯之舊法旱則修雩吁嗟求雨而已未聞有事於泰山是魯雖得祭泰山而謹之重之不輕於祭也如此今東嶽之祠徧四方窮陬下邑徃徃而有田夫里媼日扳援叫號以禱以禴不懼其瀆何歟夫泰山之雲膚寸觸石不崇朝而雨天下其施溥其功鉅天下通祀可也魯固不得私焉崧越之名邑其民知禮義而通於法號為易治青社余君洪以丙申歲

來為尹平易近民濟以明敏夙夜講求民瘼與為便安  
距縣一里有東嶽行祠比歲旱禱輒應丁酉秋青蟲為  
孽禱之明日蟲罔遺育令知神之信已愈自飭敬事神  
越己亥夏六月大旱早苗多槁死老農謂過處暑藉不  
得雨晚禾不復矣令聞之戚曰民以食為天今視天枯  
然設不幸如老農語民且殆令何心獨全復走祠下願  
減己壽年為百里命請命於神越三日果大雨四境沾  
浹焦卷盡活苗怒長乃有秋民皆喜色相告我從令得

雨令實活我令謝曰神賜也吾敢攘神之功惟是舊祠  
久毀神棲數瓦下前令李繙於其東南六百餘步作後  
寢令令至繼作正殿揭虔妥靈盥薦始有所而兩廡門  
觀未備也乃諭於衆曷圖之用答神意民又皆喜願盡  
力賦丈屬役某任某事而為之期起九月畢十月趣具  
百煩工徒竭作至期成焉屋凡百楹昔所未備今也大  
完輦飛雄峙一旦傑出官道之西中為一亭由亭達於  
橋由橋達於祠池蓄異魚環植佳木侈廟貌而昭神貺

也士民共樂之櫟楹在野歌舞在道薰為太和以迎善  
氣以占嗣歲其屢豐年無有菑害又益喜相賀願伐石  
紀其成則因予世舊上虞劉悌壻西秦張楨以來請紀  
惟神無方無在不在賢令尹不有其躬欲以撫塞民灾  
發於衷誠非有一毫自為意故神之聽之雖遠而邇大  
庇於民民從之役不踰時食其報者而或者昧損上益  
下之義刻民之肌惟已是利水旱弗卹諉曰非吾咎神  
弗顧答則且將事土木以要於神失其本矣曾謂泰山

不如林放乎予嘗使越未能忘其民也既幸其獲蒙神  
休而尤有感於令之義特書之俾刻焉以告於來者而  
繫以詩曰

巖巖泰山實奄東魯龍駕帝服爰作神主使雲前驅風  
以為御歟衣尚征左右帝所惟越在東則其一顧慨  
彼槁乾沃之膏雨旱火不光休氣布濩泰山之陽民  
拓新宇石梁既抗於門於廡廟寢孔碩神其來下其  
靈剡剡瑤席椒糝載掄爾瑟民歌以舞水有魴鯉

陸有杭徐至於來茲豐年其屢神功莫名樂哉此土  
維郡維邑皇受多祜

至樂齋記

古渚文君心之間為予言吾室環堵門闕落然孰使吾  
終日安從而不去者非書乎書誠吾之至樂也或者曰  
書糟粕也憂患也至樂無樂乃皆束書不觀游談相高  
以是為至樂焉人蓋有飲食而不知味者未有不飲食  
而知其味者也吾固疑而不信且吾先人寡慾而好書

頗勤勤輯散軼以遺其後授而讀之未嘗一日而舍書以教至哉天下樂終日在書案此歐陽書語也故吾摘之以名讀書之室而求吾之所謂至樂者予聞而異之讀書亦大難異時藏書之家所少非書而讀書者常少無他書易得而不知其為可樂書肆而已雖讀之不樂也與亡書同佔嗚而已雖讀之不樂也與不讀同鄴侯之架一一懸牙籤新若手未觸韓子之書視歐陽殆不免乎譏韓言藏歐言讀李繁輩其果能讀而樂乎否今

之書日益以少而難得讀者宜益以少君知其難易將  
至矣有能知書之難得則知書之可樂而至樂者出焉  
心之生長見聞資稟卓異意氣之盛如川方增乃退然  
承其先志以歐陽子讀書為法夫歐陽子蓋知其難者  
也自其蚤歲率從人借書且抄且讀嘗見昌黎集於隨  
州某氏破篋中求之以歸始為古文每嘆在夷陵欲求  
史漢一觀不可得是時承平且久書難得尚爾迨其晚  
歲所藏僅萬卷三代以來金石刻千卷又皆出於四方



萬里窮絕之處得之難然二者非有聲色臭味可以移人而公甚篤好或手自校讐或以立訓傳或以訂史傳百家之訛謬至與其為六一而樂之終身其得之之難而樂之至如此詩蓋言其平生所得而實則天下之名言也彼謂歐九不會讀書豈知言者哉心之藏書不多於歐陽子之晚歲亦不易於歐陽子之早歲今也坐一室中牕明几淨左右橫陳俛仰千載非芝編縹帙部居條列以為美也非虞初稗官凡將急就以為博也非薰

香摘艷以為功也蓋有其至樂者之存吾心而已所自得言莫能喻抑知其難而有以樂之歟心之屬予記顧眊惛因記其所與予言者且以信予之說毋遽忘其難而寢趨於易則其樂亦無窮矣如江海之浸膏澤之潤渙然冰釋怡然理順此則至樂之候也又將以是觀焉

林菴記

壬寅首春林菴廉訪僉事按臨吳興郡郡之吏民莫不洒然改視易聽與歲俱新不以苛察為明健決為斷深

刻為能酌緩急寬猛之中隱然虎豹在山林而藜藿不  
採蓋輿人之誦如此而予卧病荒園久絕情造請乃特  
枉車騎過之濶畧將迎高談朗詠瀹茗從容因知其所  
存過人遠甚間謂予曰若知吾林菴之意乎昔吾嘗從  
事安西幕為蒲城長由河洛嵩華道襄峴以出岐梁往  
來秦商蜀漢之間今自監察御史出贊浙西憲司由魯  
復淮泗絕濤江至京口過姑蘇憩於錢塘以來茗雪凡  
天下之名山巨鎮雄偉而傑特孤峭而奇絕娟秀而宵

深者皆徧經而歷覽雖外縻乎職未能超然自放其間  
以遂吾平生之志然未嘗一日不夢想坐馳每念入林  
恐不密之語為之慨嘆故以林名菴以見吾意願為我  
識之予以眊惛辭不可竊惟古之高人勝士胸中自有  
林壑功名富貴不能涉其藩干其慮故在魏闕如江海  
在市廛如山林不見其異否則富貴之念先入其中藉  
令巖居川觀其視嘉木奇石縈絆耳晴嵐暖翠塵眯耳  
朝猿夜鶴籠檻耳適足為吾病焉况方沉著富貴又安

能使之一旦以此易彼哉林菴恬淡文雅公退之餘觀書之隙或呼硯與筆濃墨大書體嚴勢逸各當其物或倚闌舒眺撚髭索句嘲弄風月直欲與槧人墨客角其技或屏都騎載單舸上下林壑窮幽選勝忘其日晏其視富貴為何如也林慮之山豹林之谷衡岳之雩林岳楚之道林廬山之東西二林固已盡在林菴中尚何俟予言夫以林菴之能諝抱負有功見之當大究厥蘊次猶當長諫官御史言聽志行使窮陬僻壤山顛澗隈之

氓皆被其澤而支離疏輩亦得與木石共老豈徒專林  
菴之樂以自樂哉尚平了婚嫁而恣游五嶽謝安石成  
功名而雅志東山付之他日未晚也

周景遠君子堂記

東平周君景遠甫壬寅之夏以使事過雲首扁舟訪敝  
廬靜專大雅溫然君子也良以既見為喜他日再見語  
益親蓋君子嘗名其燕處之室曰君子而以問於予夫  
君子成名之人也君能取以自名美矣予何足以言之

且孰不願為君子如堯時君子十六人周時人皆有士  
君子之行而魯亦多君子其類衆其道廣固君子之願  
也不必自有其名然陽一陰二大往小來可為君子而  
不肯為君子可化中人而不能化中人則君子之類少  
而君子之名始著君子之名著而君子之道始孤矣豈  
君子所願哉名者忌之招而又兢兢然抗其名以為的  
於天下吾懼其立於獨却往來無方也故蘧伯玉恥獨  
為君子何耻也耻不能使人皆為君子而已立於獨也

後之君子或不能為蘧伯玉徒使惡直醜正者競起而相仇名適為君子累楚之好修漢之尚節義及唐之清流是也無乃好名之過歟周君曰子之言幾矣其曰好名之過者何也君子病其名之不章學以求於君子求而不得者有之矣未有不求而自得者吾方求於君子之不暇而暇好名之避乎避好名是君子不可為必同流合汙而後為得也夫實之所在名斯從之抗君子之名不可避君子之名滋不可吾升吾堂因名思義凡易



象傳記稱君子者殆數十百其嘉言善行一日森列左右實果外乎名哉吾家濂溪子曰實勝善名勝耻也故君子進德修業孜孜不息務實也意謂務實則其實修而名善非惡乎名也而敢以是說繼衆君子後以自儆焉不亦可乎予益異之予聞周君之先嘗躋膺仕習聞中州風俗文物之舊君趾美象賢早有令譽宦轍所至不合輒引去不少徇流俗往往寓意於詩旨趣甚遠今以博文多識與於禮文之事蓋所謂君子以制度議德

行者既無負名堂之義而猶務實自做如此可敬也因  
具識之予前言則陋矣



陵陽集卷十



總校官進士臣胡榮

校對官中書臣吳俊

謄錄監生臣胡觀瀾

欽定四庫全書薈要

集部

陵陽集卷十三

一至三

詳校官助教臣謝登雋



欽定四庫全書薈要卷一萬五千九百七十八

集部

陵陽集卷十一

元 牟巖 撰

記

游桃塢記

 周卿糾湖學晉輔長尹堂兩邦相望故家蔚如此會

晉輔秩滿歸相與挈家望母憇桃塢菴楚望漢卿偕內  
外諸孫侍文孺輯杖候於門親友來會者予與文性之  
史順甫劉道甫自俞步至菴五六里所菴雅潔可居滄

洲翁所位置翁以來增葺之前曰桃塢後曰更不疑巨  
碣峙立趙庸齋筆也先人氏名亦在焉時適三月半雨  
新霽青松如沐笋已上番茶蘼盛開芍藥亦有開者主  
人兄弟怡怡愉愉連日以奉母之觴徧酌客飲酹甚歡  
中夜復浮大白對床笑語尤真吾觀周卿飯不足晉輔  
囊無餘而能調娛其親不知山中為寂寞而妻子皆有  
自得之色此固人之所難而吾儕之所為喜也留三宿  
與時止時作拄杖叩諸菴徧叨茗供殊清適性之玩金

鯽魚良久隱見不常若自珍貴不可致者雨盛還菴中  
性之大書雪壁且賦詩一章曲盡佳致紹老克翁亦繼  
來期而不至者史載陳正則正德缺文端甫予則陵陽  
牟某獻之甫也時丙申三月十八日記

荆叔麟以齋記

都邑浩穰承平日久上恬下熙弗慮弗圖一旦風塵倏  
起父子兄弟對面相失顧吾心之天者獨在過故墟睹  
遺蹟感慕傷嗟有不能自己者焉若荆叔麟之復為此



齋是也叔麟之先父諱某自號以齋居杭新門裏朝市  
肩相摩不樂仕進自壯至老手不釋卷尤善書以齋其  
所書也八法咸備見者忻羨生乙亥終丙子年六十有  
二五子綸緯紱紳素紱即叔麟少年事遠游去杭且三  
十年歲乙巳來歸自宣問其兄弟鮮矣問其室廬燬矣  
興言往事無與共語古有為鶴語者曰去家千年城郭  
如故而人民非而塚累累歲代遼邈理有必然無足怪  
者三十年者特千年之一瞬息爾叔麟之所與遭遽至

於如此可勝嘆哉幸四世之祖墓在西湖之上守者無  
恙再獲瞻省有念以齋不可復見不覺感慕傷嗟非吾  
心之天者其孰為之要不當以世變論叔麟卜居鄉閭  
復為以齋子昂集賢趙侯為大書而揭之越丙申夏因  
來寄聲求記其事予惟以齋以以名齋非徒自謂也蓋  
將遺其後之人不在叔麟乎夫生事之以禮死葬之以  
禮祭之以禮為人之子終身行之猶恐弗克況生事奠  
祭之而不得以其禮欲報之德昊天罔極此心當何如

傳家名齋曰以以之一字叔麟固宜敬恭朝夕奉以周旋思其音容而屬其荒絕存其手澤而著其德善以齋在是則吾親在是吾親在是則吾心之天在是千載一日而何三十年之有叔麟人今而貌古有學問有踐履必能立身揚名以圖其孝之終以大其門以無愧以齋之義矣

報德院記

距松江五十四里而近曰下橫涇時思報德懺院在焉

蓋佛氏有大報恩七篇柳子厚以為此七篇皆由孝而  
極其業以儆夫世之蕩誕慢弛好違其書者夫報恩即  
報德也報其父母生成之德也而其報德又莫若懺罪  
報德者昊天罔極而致其時思也懺罪者改過遷善而  
致其愧悔也豈不五體投地千聲齊唱而求其罪消滅  
哉院之主僧曰友懽派出顧亭林寶林寺自幼敏悟聽  
講天竺能背誦法華經修長期觀氣貌古樸不事外飾  
兼通周易嘿參妙義非苟焉者宋咸淳辛未易徐氏基

地結菴廬以庇風雨以事香火度弟子元吉普潤等善  
治生廣業普潤習台衡教於超果分任院事次第而舉  
懽問語吉與潤曰吾年七十行且去矣盍為我罄衣盃  
建九品觀植淨土緣且市田為供給刻之石以示久遠  
元貞乙未啟長期申祝讚首牒三門兩廡僧堂歲役未  
竟大德庚子壬寅懽與吉普相繼示寂潤竭蹶嗣乃事  
置法堂砌祖塔構鐘臺建釋迦殿塑左右侍從普陀大  
士羅漢諸天備極莊嚴壁有金彩沼有紅蕖層閣飛檻

高接雲漢平蕪絕島近在目睫殊偉莊嚴遂為一方勝處先是啟長期之歲東北隅忽竹園產靈芝夫竹之有筠四時不改柯易葉已非凡植况靈芝煌煌與寒光翠氣交相映發邪衆皆歡曰造物者生祥下瑞以有此芝振動時人之耳目故一切興修有相之道次第而成不待懺罪而德已報矣越至今日咸歸功於潤焉潤自號澤翁篤實而疏通是能盡報德之義克與先業盛其福澤至大戊申春賜金襴袈裟號慧光普照大師尤有榮

耀焉良月遠來求文以記予蓋不獲辭乃銘曰

於惟懽公秉志夙堅爰發宏誓獨奮空拳始來橫涇  
把茅三椽殿堂樓觀一旦屹然翠樾之杪華榜高懸  
是曰時思以報所天報之維何懺罪是先誘化澆俗  
崇植勝緣網緼和氣芝實鍾焉九莖三秀衆美具全  
厥在報德其應尤專人所創見競誇以傳潤也師吉  
後克繼前晨夕薰修不懈益虔施於奕葉益昌以賢  
如澤之潤獲福無邊

義齋記

臨安山水天下奇異時英雄崛起之跡歷久而平錢氏  
子孫希白穆父輩皆去而為文詞取科目司誥命至近  
代平齊洪君出又以倫紀常著名節流風餘論今猶可  
攷也方君天瑞生於是鄉妙齡秀發雅慕前修劬書嗜  
古而喜為詩其居有山月吟牕日嘯咏其間家則堂嘗  
為作詩序其胸次已不俗又以義名其書齋而問於予  
予曰識督學落然嘗聞仁以義節故親親而仁民仁民



而愛物否則愛無差等墨氏也氣可配道與義故浩然  
塞乎天地否則以義為外告子也敬義立故德不孤否  
則敬以直內而不以義方外釋氏也若是者皆不能以  
無義義者固非一行一致之為而子猶昭昭焉以義為  
揭者何哉豈有夜半叩門攝衣從之不以在亡為解者  
乎亦有懷憤不直拂人色上而稠人廣衆輒譙責不顧  
者乎抑亦有排難解紛辭千金而不受因絕其人不與  
通者乎天瑞曰是之所義非吾之所謂義也況并以辨

義義之與比君子喻義之類曷嘗不專言之而元麟之  
取節則原道行而宜之之語也昔曾子曰義者宜此也  
中庸曰義者宜也楊子雲曰予得此宜謂之義也韓子  
殆本此歟予於此知天瑞真好義者矣夫天下事物莫  
不皆有當然之則子之居是齋也盍試思之自君臣父  
子兄弟以至朋友鄉黨鄰里以至一語一言一舉動云  
為之際凡行之而得其當處之而得其平由之而得其  
正辨之而得其分者皆所謂宜也義也是義之名也固

標絕於一辭之表而義之實每裁制於衆理之中雖以之為詩可以興可以立可以怨可亦義之宜也發於情止於理義止亦義之宜也傳曰詩書義之府也孰謂吟牕之不謂義齋乎

敬愍侯祠記

唐以來使海外亦曰使絕域其選甚重至元甲申朝廷以日東國負險遠不可武令遣使者宣示德意用懷柔之於是刑部尚書福建道宣慰兼提刑按察司福唐王

侯除叅知政事張帆揭節乘舶以行侯姿儀山立足以  
疎物望知畧輻輳足以應事會辭辯淵博足以申使指  
人皆謂是行必能得要領歸報視海如塗不勞戈甲坐  
以無事曾幾何時諱問倏傳朝論嗟惜具列其故追贈  
錫爵節惠定謚曰敬愍侯卒時年五十六五子皆早世  
祿其季子都中為少中大夫平江路治中即吳中賜田  
宅所以飾終恤後者備至其孤奉母張氏來居吳相依  
為命母獨深念旅魂不復終天曷報乃削髮為尼住妙

湛寺朝夕繙經禮拜歸誠於佛修寺起廢役凡再舉蓋  
佛有大報恩且使其孤一意事國焉厥既就職追慕不  
少衰又念人子事死如事生事亡如事存求之無不至  
惟佛俛仰之間再拊海外吾父死而不亡安知不往來  
與俱遂闢寺東廡創敬愍祠塑侯遺像以嚴香火以致  
延佇冠佩有肅神采如生相率拜祠下且喜且悲因市  
田百畝捨入常住為此祠歲時重修及七月十五日忌  
日追遠費專一僧掌之具有規約治中繼陞大中去為

浙東宣慰副使歲癸卯自述顛末來以諭其先友陵陽  
牟某求為記刻石示方來嗚呼予尚忍書敬愍侯之事  
哉昔葉公子高將使齊問於孔子以為事若不成則有  
人道之患事若成則有陰陽之患欲處若成若不成以  
自免而孔子則曰事君者不擇事而安之忠之盛也盍  
勉之使忘其身而遂行耳今侯之遠使猶未入國不幸  
賁志而終雖慮患不如葉公子高然視孔子之勉子高  
者夫何歟是固宜書况有賢嗣于旬宣立身揚名式克

負荷其為是建祠捐田種種佛事匪直以妄塞悲也一念之孝根於心通於神明抑至也宜牽聯俱書焉後之人尚守成規廣前志惟誠惟敬弗懈益虔是祠也千禩一日永終長存可也侯名積翁舊朝名執政留耕先生伯大之猶子故自號存耕留耕嘗為端明殿學士制置福建云與我先人道誼交而侯又於予厚死生契濶執筆泣然復為歌辭三致意俛侑祠焉辭曰

訐謨碩輔宜廟堂一朝龍節徂遐方揚颿直欲捎扶

桑怒濤稽天物怪狂奄忽誰為尸不祥魂兮渺渺之  
何鄉亟命下招遣巫陽謂我弗信眎密章吳都繡錯  
美稻梁甲第中啟窅洞房湖山左右蔚相望魂胡不  
歸此徜徉追思罔極涕泗滂新祠屹若依寶坊雨花  
繽紛梵唄揚侯兮來歸駕鸞鳳陰風颯沓佩玉鏘有  
椒其醑羅餠餽歲時宴娛跪陳觴子孫世世永奉  
嘗

松江普照寺釋迦殿記



松江普照寺陸士衡別業也自孫氏歸晉兄弟入洛以  
文膺事任威聲權勢振動當時倚伏者相尋曾未瞬息  
已有華亭鶴唳之歎而其臺榭化為像設研席化為梵  
唄乃至今存何歟寺北坐九峰層巒疊嶂攢青擁翠相  
為蔽蔭陰陽家者流謂風氣藏聚可安千衆蓋特於佛  
僧為宜也唐乾元時本號大明寺僧兩惠嘗創釋迦如  
來殿逮宋祥符間改賜今額道者嚴善誓僧宗幸真歇  
凡三度重建淳熙戊申厄於祝融里人錢武翼仰之首

議興造其事未竟子之信竭力繼之使張彥中掌其費  
僧祖鏡等佐其役咸淳甲戌僧惠思與武翼舊念不可  
廢前人功亟勸率賄施以助殿始成衆請行啟典殿畢  
塗墍而營像設於是慧辨願慧悟秀以白鎮守沙侯欣  
然致從吏且厚施之起益傾貲化緣不憚勞費久之而  
就萬瓦鴛浮重檐翼跂加以藻繪金碧交輝中設釋迦  
像若左若右分列八位備極莊嚴而三世如來圓通大  
士應真羅漢諸天人之相亦次第而成至於琉璃無盡

燈瓜華諸供且莫不完好每歲州侯率其僚屬於此建  
道場申祝讚而禱水旱穰風灾者亦皆至焉夫成之難  
則其傳之也必久是役也再見丁未甲子復周蓋非一  
手足之力而超成其終功尤多可謂難矣超既寂其孫  
了聞職是薰修事實來求文以記曰是固所以久傳而  
不廢也予聞萬形皆朽惟理獨不朽者而佛氏亦曰一  
切諸法皆有破壞惟有法身常住不滅雖與吾說若不  
盡同然所謂法身亘古今彌宇宙到處充滿亦無雜壞

豈拘於形而外於理哉區區言語文字如浮雲如空花  
乍起乍滅了無根蒂反欲取其常住不滅者托文以傳  
聞也果以為能久傳不廢也蓋亦歸諸於已而已乃為  
之讚曰

維我普照王本自法身出光明攝方寸虛空常獨耀  
盡三千大千無限河沙界皆佛慧照中夫是之謂普  
衆生宿業重展轉動迷誤願佛垂慈憫與除諸障礙譬  
如摩尼珠炯炯照濁水一作是念已業去障自空而

我初不覺心目劃開朗稽首釋迦尊為我證明之

普照寺千佛水陸院記

普照寺自唐乾元元年至於宋數百年矣屢興屢廢淳祐戊申迄今又六十年寺之耆宿分任其責山門列廡佛殿次第興建千佛水陸院地廣費鉅衆請屬之惠慈大師志新既領主席於是慨然捐衣盂營檀施寺僧元德為之分幹徒弟淨思淨心聞入為之叶贊大作新之始於戊戌繼奉護持之旨其事尤嚴越丁未乃來求記

予嘗記釋迦殿矣固辭弗克則復之曰善必由積累而後成佛乃曰不於一佛二佛三四五佛而種善根已於百千萬佛而種善根何也夫計億兆者本於一至寬乃所以為至衆也且一者何心是也心以方寸而總萬物如木之有根柢生意亟活千條萬幹聳壑昂霄皆自此始水陸院之義亦然昔梁武帝嘗制水陸儀文三年而成幾三千卷其後修設者以十六位各分八位而為上下召請則通三時法雖簡施則博其上八位慈容瑞相

為人敬慕下八位殊形詭狀為人恐怖有善有惡有勸  
有戒大率以懺悔為先有能用意猛烈一悔之間諸惡  
盪除衆善咸具曷嘗不本於一哉令惠慈於此三後位  
置曲當山門兩廊壁湧天台聖域五百高流閣上設西  
方三聖銅鑄千佛閣下設千葉盧舍那佛普賢文殊二  
大士左右壁湧水陸冥陽三界像間飾以金采眩耀衆  
目輝映方池而其池面菡萏敷披飛檻相屬生香不斷  
疑淨土移來此地諸佛子於焉修行莫不超然得大自

在皆惠慈十年之間苦心勞形之所成然亦其胸中自  
來積善如木有根故一人所發有此殊勝非徒極莊嚴  
事觀美也蓋欲使生者蠲其罪業日增福祐死者拔  
其幽滯免墮輪迴而已世安有一念之頃不能感動  
鬼神而能普濟含靈功德無量遍河沙界乎惠慈得  
之矣銘曰

我觀人心內有善元無惡顛迷彼佛知往往路頭錯  
爾時諸天人一切諸菩薩忽現慈善相與衆共說法



法皆由心造罪亦由心起心起罪一空各已得度已  
衆生地獄衆六道阿修羅隨佛登天堂只在一刹那

澹軒記

燕山喬侯扁所居軒曰澹參政左山商公挺實名而  
書之因來寄聲俾為之記顧某老悞不能為役而喬侯  
之意友朋之屬不得以辭澹之義大矣嘗試求之蒙莊  
氏外篇其刻意則曰澹然無極而衆美從之繕性則曰古  
之人在混茫之中與一世而得澹漠知北遊則曰相與

無為乎澹而靜乎而刻意之言為尤備始言澹終言淡  
中言恬三言者雖若不同其致則一實相為用焉夫惟  
澹然然後能無極而衆美從是故夫平易恬淡則憂患  
不能入邪氣不能襲德全而神不虧言恬者如此虛無  
恬淡則合乎天性純粹而不雜靜一而不變淡而無為  
動而以天行言淡者又如此一澹之中衆美咸具喬侯  
名軒於焉取義不亦善乎然蒙莊則曰此乃養神之道  
非朝廷之士尊主強國之人之所好也惟是喬侯入則

郎省戶出則贊藩方今又懷澄江丈二組有社有民誠  
朝廷之士尊主強國之人而惟澹是好獨何歟予竊謂  
人生而靜以上不容說澹庶乎近之自朴散淳澆習俗  
破蕩功名富貴之役勞吾形聲色滋味之奉汨吾神攻  
者衆存者寡惟欲虛徐其貌容與其意而自以為澹事  
物之來未有不叢脞膠擾失其故常者無他神不全故  
也神無為妙萬物昌嘗淪於空虛同於無用哉夫存神  
以致用易說也豈惟蒙莊賢哉喬侯日坐澹軒因名思

義恬無嗜好焚香讀易叅玩爻象以洗其心何其澹手  
抄經史左右森羅吟咏其間寄興簡雅何其澹庭空月  
朗神閒志定素琴橫膝太音希聲何其澹所養愈深則  
所存愈澹神不虧而用不煩矣昔曹相國避堂舍蓋師  
用其說從民之欲慎以無為且去刻深吏而進謹厚長  
者清靜寧一天下實受其福所謂朝廷之士尊主強國  
之人非耶敢以是記澹軒喬侯名簣成字仲山甫云乙  
巳六月二十五日記

簡齋記

人之有宗族猶水之有源委木之有根幹其所從來遠矣司馬子長班孟堅皆嘗自叙李翱及舊史皆稱韓氏自叙其先本漢司空稜潁川人後徙陳留中昌黎韓文公之先世也世之自序率本諸此惟陳氏本京人繼徙眉之青神太常公徙雒陽長子忱京東轉運使靖康中運使子慈州司士叅軍揮避地蒲之猗氏遂家焉簡齋則太常次子恂之孫也靖康南來紹興間叅知政事以

疾請去除知政殿學士知湖州歸老烏墩之精舍既沒  
遂窆於歸安縣廣德鄉上强里之岩山南北隔絕二百  
五十餘年兩房子孫簪纓不絕但不復相聞區宇混一  
以來叅軍之五世孫損齋公來為浙東廉訪使即是叅  
政之五世孫垕訪損齋浙東叙兄弟焉離而復合夫豈  
偶然然損齋慨念水木本源自浙東謁告來雪拜簡齋  
之墓漢人以過家上冢為榮公之此行蓋為得之俾予  
識其顛末將刻石列之冢祠予與簡齋之先俱蜀人今

寓於雲竊嘉公尊祖敬宗之義不敢以固陋辭云

新廟記

鬼神之德體物而不可遺誠而不可揜所謂造化之迹也故社稷有祈有報有由辟而山陵川谷丘陵能出雲為風雨民所取材用亦得祠焉未有宗而不感感而不通者世弗燭厥理或淪虛幻或涉怪誕事神之義戾於古矣越上虞縣四十五里是為廣利侯廟崇岡列峙大溪橫陳乃衆流所匯閼蓄精祐前有二石筍東南有二

龍湫禱禳必應其民無水旱之憂宋熙寧八年制以神  
聰明正直庇於一方供民之求如影響應特封廣利侯  
實協古道太守趙公抃紀其事於石使君祠事益恭如  
制書侯蓋石晉之方石聖官而吳越錢氏所封通澤將  
軍也按唐乾寧三年錢鏐以兵渡江誅董昌遂并有越  
歷五代至宋初八十四年雖通職貢奉正朔猶自封其  
境內諸神故侯有此號然歲無所攷舊記乾德二年邑  
令盧某禱而獲應其得封殆斯時乎又十七年錢氏始



入朝又九十七年始去錢氏舊號二百年間畧可攷者  
如此而晉非典午之晉則明甚建炎省方過縣而趨四  
明義旅隄扈見空中旗幟有若廣利侯之號此其尤卓  
異者也廟舊在石筍下紹興辛亥始更面勢迄今又將  
百有餘年日毀弗不治薦酹無所前嘗護他役神弗顧  
答歲在乙未里儒金應辰慨念古誼興任之於是金夢  
桂潘行孫分其職僧處恭總其施若廟寢若門廡次第  
一新崇閎嚴翼軼於舊觀竭虔妥靈近遠來會歲復大

穰嘉氣時效呼舞載道惟神功是贊以某異時嘗使本  
道其治在越粗無愧於神惟民使來請記惟侯開五季  
能保捍茲邑民於兵革搶攘中以俟平一膺荷寵靈廟  
食其土有感必通惠利廣矣雖中更多故而神之昭明  
發見著在人心如一日廟貌載新敬事自今始宜有紀  
述次推獻公辭弗獲乃推迹本原嗣書之用侈神之休  
烈昭示方來無有闕

陵陽集卷十一

欽定四庫全書薈要卷一萬五千九百七十九

集部

陵陽集卷十二

元 牟巖 撰

序

顧伯玉文藁序

士散久矣卓犖非常者負恃其能不肯輒俛首從流俗  
時又無大科異等以得諸徒區區建數尺之竿懸一魴  
之餌而欲待橫江之鱣不已疏乎且羣舉茂異歲一人  
美名盛節也孰不以為希濶難逢而幸一值焉然不聞

羣刺史勸為之駕縣次續食與計偕又不聞公車朝奏而暮及故士始而奮繼而疑且怠造端宏大而其畢也小事之不可料每如此攜李顧文琛伯玉豈非所謂卓犖非常者與年弱冠著文名實在是選勇不自制一旦躡屩走數千里新豐逆旅斗酒獨酌解橐出所為文類進卷行卷者寫之生紙以干氣象是時伯玉年少意銳如川之方至太阿之出匣三軍之負氣其視一世為何如濡留兩載執我仇仇亦不我力倦遊以歸鼂董公孫

皆前為博士乃冠其科伯玉豈有不能正使須試而後  
用何至參差回薄今猶在羣博士下予滋所不解或者  
曰伯玉論太高文太奇嘗稱作傷已賦以為雜之退之  
子厚憫已懲咎諸賦殆不可復辨又嘗上書光範以為  
世無蘇明允不當在弟子之列其辭驚然無所謂遜寧  
知不取造物者所惡忌耶予觀自昔文人往往高自標  
樹范曄謂吾諸論放縱實天下奇作其中合者不減過  
秦陸機謂聞傖父欲作三都賦待成當覆酒壚杜審言

謂吾文奇當得屈宋作衙官雖昌黎亦曰世無孔子不當在弟子之列何獨以尤伯玉造物非忌能者意者磨礪涵養老其英華而大其器業誠所以厚伯玉也今伯玉學日新文日盛必將盡窮天下正理盡備古文衆製期名世而後止命之通塞科之大小要不必深計伯玉久交予壻張栻又辱交予子應龍携文過之若以古道相存取予既耄昏平生多愛奇氣習畧盡無以知伯玉姑論其大者而歸其編

送梅君遇入龍虎山序

梅君遇居澄江有詩書之業水石之勝以貧故不能不出從斗祿奔走塵埃鞅掌獨勞非其所樂一旦賦詩拂衣徑去何其見之高志之決也自號雲水道人忽又棄其家入勾曲山為道士布褐芒屨霞餐芝茹見而識之者相與勞苦輒笑而不答尚喜為詩好風涼月時復朗吟能自道其意近寄聲云當繇柯阜出氷谿以訪龍虎之仙山而贈言者頗衆予老病日侵強食息人間世旦



暮且盡欲附六翮從之不可得可恨可恨君遇其子真  
之苗裔耶仙山乃騎麟繫鳳霓旌絳節之所上下而往  
來是行也安知不與子真神遇幸為我問之曰自去九  
江隱吳市門翩然遐舉為仙果樂否雖無妻子累然平  
生一念惓惓憂國能遂忘却千載之下誰與論此意頗  
為我迫爾而笑否

文子序

禹受計於會稽會稽會計也武康計籌山因計然嘗度

地於此而得名然其義固有所本范蠡師計然見於史  
記顏師古以為與孔子同時是也其書曰文子者有與  
平王問答語徐靈甫遂以為周平王時人則誤甚劉向  
著錄文子書九篇耳李暹所註乃十二篇疑不能無附  
託其間或謂乃楚之平王楚越相強平王時楚事日非  
子胥既奔吳而計然亦去楚間道適越耶不可考矣南  
谷杜君辨博而篤實恬靜而疏通其可以用世而其  
志果於遯世雖嘗領蘭臺珍館亦復舍去築披雲之菴

於計籌山上燕處從容取文子書及其事之散見它書者會粹而刻之三代古書遺跡一旦震發於湮沒之餘真山林一大奇事予觀自昔財計之臣鮮有能自全者計然之策范蠡畧用之於越十年生聚既以報吳乃飄然遠隱竟免於烏喙之毒手而圖謀相便計然乃神仙得道人

闕

已蓋計然嘗受於老子者也夫善計不用籌策此豈區區廢居操縱從事於鞭算之末乎不貴難得之貨不舍

儉且嗇不以不足奉有餘生財而不有成功而不居若  
是者蓋幾乎道固已超然於利害禍福之外而世之擁  
貨專利者往往違天時竭地利自謂以心計析秋毫不  
知正犯道家之所深忌祇以自貽殃禍覆轍相尋曾莫  
之悟可嘆也南谷嘗注老子得其宗旨又萃此書俾與  
師說並行其警世切矣學者合而觀之可也雖然書徒  
糟粕曠洞遐想沆寥虛閒胸中係累雲掃霧除豈不一  
快然者哉又安得從南谷君登壽峯望玄壚求鴟夷子

所以泛湖之處

杜南谷籌峯真率錄序

百世在吾前千萬世在吾後求為可傳而後有以傳琅  
函羽葆典領名山則夫章既往而垂方來弗可略已此  
籌峯真率錄所為作也計籌山之陽夙有靈跡周計然  
子文子開其先晉太極左仙公葛玄繼其後雖年禩云  
邈而斗壇丹井猶可尋越前朝南渡楊武公茂勲請葺  
常構齋宇以奉家祠香火歐陽公故實也未幾復為報

德昇元之觀命毫人洞微先生祖常主其席遂當左仙  
處號重以德壽宮親御寶跗錫之華扁昭回雲漢焜耀  
林泉式克至於今粵歲某甲當塗杜道堅實來上距祖  
君十二代然才百年而兵革之餘次第經理為力盖有  
甚難祖君時者矣厥既捍衛其樵牧以妥以寧則倒廩  
以賑荒山顛澗隈耄穉賴以活因興敝舉廢一新之百  
廢具舉類無不可傳者顧前人源委世次未有紀用為  
大欠乃為真率錄裒其名氏列諸左方俾後有考焉夫

衆萬不齊本其初一真而已真則一而不二純而不雜  
至實而無妄故真心存則真氣聚真氣聚則真脉永後  
之人尚思杜君之所用心迓續之持保之其可傳者將  
與此山相為無窮計然援范蠡傳最為端的不繫於此  
山故不書

周公謹齊東野語序

野史雜錄尚矣疑傳疑信傳信為史者網羅散失率多  
取焉否則參稽互質焉張昞謂李林甫冰山開元錄中

語通鑑取之他若壺關錄樂天樂甫無微不考莊宗還  
三矢於廟雖五代史顧不取唐史如高祖字叔德則見  
於唐書直筆姚崇十事要說則見於昇平元記室耆次  
相張齊丘失於詳考不免承明皇雜錄之誤續長編號  
為謹嚴乃以湘山語錄附見開寶之末建紹以後曾布  
日錄蔡條後補初不以人廢而秀水閒居之類繫年要  
錄亦頗及之然皆隨事考析或為疑詞故不足以累其  
書昔名臣言行錄之始出東萊貽書晦翁以為尚多考



訂商略者願相與討論大抵皆此意或謂建隆遺事涑水記聞邵氏聞見錄馬永年元城語錄等書若有所去取其間則前輩嘉言善行之在人耳口相傳以習者所存殆無幾是又不可不知也余病卧對牆壁平生結習掃除畧盡每聞人談舊章故實往往面熱汗下已為椎魯木僵人周公謹忽以齊東野語示余豈尚以故意待之耶公謹生長見聞博識彊記誦之牘存於篋以為是編所資取者衆矣其言近代事特詳盖有余之所未聞

或聞而不盡同者乃自託於野何居文勝質則史質勝  
文則野與其史也寧野野固非所病也况禮失求之野  
謀之野而獲何獨史而不然他日任筆削者儻有取詎  
不能補史氏之缺而發其所諱乎卷中載脫鞞圖贊先  
君子之遺事也嗚呼寶祐開慶之間奸邪小人奴事熏  
腐中外相應以醜正誣善之說欺君誤國馴至不可為  
識者推原禍本未嘗不太息於斯因攬涕書於卷末

仇山邨詩集序

觀水必於海觀其會也李杜其詩之會乎非精能之至  
未易據其會而擅其名山村仇君仁近嘗有辛丑出西  
岳詩適從何來而欲效淵明耶自此亦皆以甲子書似  
此例者甚衆而世獨喜言淵明蓋淵明書甲子凡十二  
詩自叙其生平出處本末畧備庾子鎮東叅軍使都已  
有靜想田園好人間良可辭之語辛丑還江陵中途欲  
投冠歸故墟以申前志乙巳建叅軍使都則其田園日  
夢想其意愈迫矣是秋去為彭澤令八十餘日遂賦歸

去來義熙元年也其使事往來及留上京還舊居皆在此六年中自此不復出乙巳至丙辰又十二年庚戌西田曰遙遙沮溺心丙辰下溪田畬曰遙謝荷篠翁則往而不返致命遂志無可復言論淵明者要當以是為斷仇君自號山村有山村不願富貴而志在田園正如已酉九日庚戌西田丙辰下溪田畬穫耳是真知慕淵明者可尚已

杜南谷老子原旨序

偏仄塵埃中胸次憤憤對俗人譚益不樂南谷杜君扁  
舟過余議論超然有以開余意相與登道場雲峯宿焉  
夜叅半出所為老子原旨余不寐篝燈幾徹曉杜君博  
極羣書不但發明其宗旨而已於某章曰是堯舜之事  
也某章又曰是禹文王武王事也其說以為老聃為柱  
下史所職者史而百篇之書亦史也故以書求之余驚  
異焉自司馬子長以老韓同傳千載不滿河上公註老  
子頗及導引吐納之類其後孫登陶弘景松靈仙人唐

道士成玄英張君相輩亦皆註老子又近神仙家王輔嗣以老子解易人或非之然其解老子則初不及易至蘇子由直以是謂襲明為釋氏之傳燈老子亦豈意其末流之至此也今杜君乃求之於帝王之書參之以帝王之事譬如披蒙昧出幽深明白正大氣象頓殊豈不甚躋世未能察杜君之心者夫道術久裂人各私其私競立門戶甚至保殘護缺以相非詆莫肯曠然舍己求為真是之歸杜君雖自號原旨而不主一家惟理是同惟經是從惟正是宗務使天下後世無

所致疑於其師之說其用心蓋若此可謂弘也矣豈固與原道哉余固陋於原旨未深究姑論其大意云爾

送程晉輔赴和靖書院山長序

教授州選比年以來不無賢愚同滯之嘆求為變通悉以委外銓注學正山長與教授同誠振淹救敝之活法也士抑遏顛頓久咸俛而就之程君晉輔前是十餘年嘗為吳之和靖山長矣至是復為會稽之和靖焉昔胡安定教授蘇湖陳后山教授徐穎徐節孝教授楚州初不以小大淹速論今晉輔

往來吳會何若是教教然而晉輔曾無幾微見顏面間語人  
曰始在吳時吾年少氣盛母老須祿養居之三年不見其不  
足年運而往欲羨不待苟得一席地溫故書數斗陳繼薄飯  
可也安所置不足其間哉况尹先生載其師說遠自川陝來  
憩西庵已而侍經筵為侍從澹然猶在西庵也其後辭侍從  
老會稽亦猶在西庵也險夷一致終始一節天下尊慕吾晚  
學乃得再托宇下講緒言夫何幸今絕江濤一日而至其虎  
湖清且漣如彼泮水有蒲與荷如彼芹藻何莫非道亦何莫



非教而凡能為學校累者吾書堂舉無一焉尤幸之大者也  
亟裝為行間者壯之親朋畢集酌酒賦詩以餞而予為之叙予  
固三十年前主千秋鴻禧老祠官也恨不與晉輔俱東春風鑑  
水不改舊波而吾非故吾矣如有問者以是語之亦可一笑  
送文心之釣臺山長序

子陵口占尺機劇切昂鉉懷仁輔義天下悅之兩語十  
四字平生所學正在此光武夙同研席乃諉曰狂奴故  
態何耶使肯幡然相助為理必將以仁義堯舜其君建

武之治當不止隨世就功而已久要劉文叔已在子陵  
劑量中陛下差增于往蓋深寓其不滿之意士固有志  
又安能自貶其學以從人哉河水不魚母落吾事子陵  
可謂不負所學矣釣臺距水極遠磴道轉山腹乃至與  
顧野王所記水邊有平石臨水者若稍殊然壤斷境絕  
真足以隱噫南陽帝鄉寂寥千載子陵此地乃遂建精  
舍聚生徒列於學宮益知太虛浮雲功業要有盡而君  
子之學殆山逾高而水逾長也古涪文心之為山長將

行求予言輒書此以貽之心之穎異絕人靡不通貫曩時父子兄弟自為師友蓋甚樂今去而之山水荒寒幽寂之處尤可靜坐讀書暇則登招隱閣羊裘軒從容吟嘯其樂未有艾也予嘗欲取所謂十四字者大書刻巖間而不果心之尚有意乎

張仲實詩藁序

始予聞張仲實名未之識頗曾見其詩仲實生王侯家不有其貴富力學自課如諸生間關多難度無所展用

始肆意於詩間之山水窮絕處吟哦忘日夕詩寢有聲  
而家事落矣仲實夷然不顧建言詩不能窮人爲之益  
力遂以詩名昌黎云不用文則已用則必尚其能者能  
者非它能自樹立不因循是也近世士多失故常拔出  
流俗用文辭致聲譽如仲實之能者豈因循所至哉故  
予決與女既來杭諸公見者問無恙外輒舉手賀得佳  
婿比過其家書數束茶數串泊如也仲實俛首微祿時  
奉甘毳娛其親而賓客日至則人人與爲酬答或高譚

極飲論文賦詩一不問有無其中要有過人者焉所為  
詩殆千餘篇已傳之好事猶手自刪去十取三四擇之  
嚴宜其為之不苟也夫以仲實邁往不羣天分高而筆  
力勝不肯稍從時尚必期於簡潔深穩而後止譬東波  
瀾就熨帖為力蓋甚難然凡詩之病既盡去而活法精  
意高情雅韻亦可得而見焉余尤喜其遣興一首善推  
跡原本有開倫紀而感行役謹時物往往出入少陵此  
非余之私言也嘗觀周詩所述山川草木風俗氣候皆

在幽岐豐鎬之間至黍離而感念深矣異時少陵由長  
安走鳳翔轉同谷以入蜀次其道里所出亦皆在於西  
秦川諸詩至今讀者猶慨然真足以繼風雅而驗世變  
仲實先秦人詩以少陵為法余閱其藁因相與根極而  
論云

嚴光大先天圖義序

邵子發先天之秘不過四圖然自一分而二推之至於  
無窮邵子以為猶根之有榦榦之有枝愈大則愈小愈

細則愈繁而朱子亦云本是小底變成大底到那大處而變成小是非假圖以明之則四圖之義未易悉究是以朱子謂東北以之西南便是自否以之泰是兩角尖射上與乾坤相對又謂邵子天地定位否泰反類詩八句是說方圖中兩交股處意欲分作四層看又謂文王八卦應地之方是邵子見得四正卦生出四角是方底意思皆若有取於圖者嚴君養晦心通於易嘗取方圓定位二圖演之為四十九圖毫分縷析如機織之錯綜

經緯布置粲然可睹而未始有所牽合穿鑿大抵一本  
於邵子朱子之說如八卦相錯一卦分八卦上下順逆  
對待博易數從中起天根月窟乾坤六子縱橫之類皆  
有以發其義遽數之不能終也自非潛玩默察先具此  
圖於胸中安能與之脗合乎亦可謂精且詳矣最後一  
圖乃易之所謂太極邵子所謂道即太極心即太極而  
朱子所謂象數未形之全體也兩儀四象之所由生今  
顧列於諸圖之後嚴君之意自流溯源蓋欲復其性初



於寂然不動之時尤見先天圖心法是當求之象數之外

厲瑞甫唐宋百衲集序

詩雅四言漢以來遂為五七言唐開元之際又始儷偶為律詩論者謂詩之道至是略盡殆不可復變宋百餘年間乃有集句者出其不變之變與求之回文離合雙聲疊韻建除郡邑名諸體無與集句類者惟聯句近之但栢梁則君臣同時昌黎則朋友同席視集句遠裒古

作頗異焉實始於半山王公半山平生崛彊執拗行新  
法則詆諸老為流俗作字說新經義則目春秋為斷爛  
朝報然乃甘撝拾陳言從事集句何耶然其天姿殊絕  
學力至到猝然之頃不勞思惟立成數十韻對偶親切  
脗合自然抑難矣四明厲君震廷瑞甫博學工詩尤喜  
集句合異為同易故為新大抵效半山而自有活法前  
後凡若干首題曰唐宋百衲集唐宋集古樂府皆在焉  
壬寅春聞吳興太守東溪李侯與其友千秋李君皆有

詩名唱酬甚盛慕而來謁一閱其集咨激再三亟俾募  
工刻之以傳而辱徵予序昔李汧公以衆琴為百衲琴  
黃豫章以集句為百家衣直戲言耳今廷瑞精能之至  
所謂細意熨帖平滅盡鍼線跡而百衲之可乎吾儕寧  
人得一破衲須蒙頭熟睡素無詩分何敢言集句然亦  
能知其用力之難非一朝夕因為識梗槩如此且以見  
君子成人之美焉東溪名岳千秋名昌齡

送俞觀光序

俞君觀光自新昌絕濤江訪茗雲望其容傾而整聽其  
論辨而博誦其詩雅而潔以思學名其齋蓋名御史默  
齋公之諸孫也曩余嘗得侍默齋同朝間者濶焉見觀  
光如見默齋觀光以選為山陰教諭乃古者鄉校黨庠  
之任雖地若分於異縣而教實本於一鄉其齒位父兄  
也游從師友也佔畢子弟也論議月旦也固未占已乎  
然予嘗上下世變自典午過江衣冠之人東晉往往皆  
在山陰而王謝諸人惟譚玄理慕風流道則未之聞也

曠數百載先朝建炎再值南渡於是尹先生以辭經筵  
得謝而來呂太史以省侍曾文清公而來朱晦翁以常  
平使者救荒而來後先相望此邦遂為道學淵源之地  
而士亦知所推尊由濂洛沂洙泗江左風尚為之丕變  
非前時之山陰也氣數回復誠不意百年之間緒言日  
泯東州文物夜艾星稀默齋公獨歸然以身任道行年  
九十視聽不衰方且立訓傳俟來世豈非天相斯文使  
之耄期稱道以興絕學乎雖藏書未肯輕出竊意觀光

自有得於親授密傳之際是行也升堂皇集衿佩必將  
發其異聞與學者共鄉之教即家之教庶幾淵源所自  
猶可考習俗所移猶可回當仁幸毋遜焉談玄理而尚  
風流夫我則不暇

張氏學古齋唱和詩序

木犀之名出於近代或云即爾雅所謂檜木者膠枝偃  
蹇秋半始花花過於枝香過於花公等安在何相見之  
晚廣寒宮丹桂婆娑下有顧兔乃一旦與之齊名玉局

翁就鳥峯蟾窟之句朝錢塘暮四海其名益盛此花盖晚

遇而翁猶恐孤芳老於澗邊欲採擷而佩之士含芳抱  
潔伏巖谷而不耀者曾不得如此花之遭自拔於凡草  
木翁獨能無情乎張仲實氏學古齋前一枝初吐香氣  
迸林戴君師初相率諸友就飲花下時適白露降之三  
日天高氣清餘暑辟易吾仲實邁往之韻挹就鳥峯翻蟾  
窟為花著語灑落不凡四座詩流競發新意而丹梯癯  
仙頗復與花共話疇昔不喜時之艷陽而喜其風露之

高寒不取花之富貴而取其山川之耿介風流賞晤勝  
絕一時可無澗邊孤芳之嘆矣予方逃瘴對庭中犀兩  
株繽紛落葉聞諸賢雅集慨然想見其處愧不克陪既  
和其詩復書此貽好事者與會和詩者一十五人師初  
王子慶周性之鄔願學白廷玉戴禹祖屠存博陳無逸  
顧伯玉王德玉丘良卿凌德甫仲實之侄如晦景忠不  
與會和詩者一人牟某獻之父

俞好問詩藁序



詩直耳目玩耳自昔詩人往往以之鉢心搗胃甚至欲  
嘔其心而少陵亦有良工心獨苦之語夫愁勞其心以  
娛耳目如膏自煎蓋可嘆而世且竟為之悲鳴兩吻不  
肯止豈所苦未易奪所樂耶俞君好問日以吟哦為事  
吾意其未免昔人之所患苦而君方夷然以笑曰吾將  
以是娛吾心閱其帙佳句層出不務為刻深噍殺自有  
意度讀之猶能使人喜豈不足陶寫性情哉必有得之  
心而非耳目所能與者君既以東坡詩句且娛心者名

問

陵陽集卷十二